



I. ERANSKINA

2026KO SAN PRUDENTZIOREN ETA ESTIBALIZKO ANDRE MARIAREN OMENEZKO ARABAKO JAIK IRAGARTZEKO KARTEL LEHIAKETAREN DEIALDIA

1. artikulua. Xedea eta helburua.

1. Deialdiaren xedea da 2026ko San Prudentzioren eta Estibalizko Andre Mariaren omenezko Arabako jaiak iragartzeko kartelaren diseinua aukeratzea. Kartela nahi diren koloreak eta teknikak erabiliz diseina daiteke.

2. Helburua da artisten sorkuntza eta parte hartzea sustatzea, bereziki gazteena, eta jai horiei ahalik eta zabalkunde handiena emango dien diseinua saritzea.

3. Kategoria orokorra eta Gazte kategoria ezartzen dira.

4. Deialdi hau Arabako Foru Aldundiko Kultura eta Kirol Sailaren sariak norgehiagoka bidez emateko oinarri orokor arautzaileek arautzen dute. Oinarri horiek apirilaren 26ko 18/2022 Foru Dekretuak onetsi zituen eta ALHAOren 51. zenbakian argitaratu ziren, 2022ko maiatzaren 4an.

2. artikulua. Dirulaguntza emateko prozedura

Saria norgehiagoka bidez emango da. Saria emateko, aurkeztutako lanak alderatuko dira, haien arteko lehentasuna ezartzeko, horretarako izendatutako epaimahaiak egindako balioespenaren arabera.

3. artikulua. Aurrekontu egozpena eta zenbatekoa.

1. Gastu hori babesten duen aurrekontu partida 70105.G/334700/48000701 "Arabako jaiak iragartzeko kartel lehiaketa" izenekoa da, Arabako Foru Aldundiaren 2026ko ekitaldirako gastu aurrekontuaren proiektukoa, eta 3.500,00 euroko zenbatekoa ezartzen da guztira. Sariak ematea eteteko baldintza honen pean jartzen da: sariak finantzatzeko kreditu egokia eta nahikoa egotea.

2. Hona hemen emango diren sariak:

- a) 350,00 euroko sari bat modalitate orokorreko bost hautagaitza finalistetako bakoitzarentzat, dagokion atxikipena izango duena.
- b) 350,00 euroko saria Gazte modalitateko proposamen irabazlearentzat, dagokion atxikipena izango duena.
- c) 1.400,00 euroko saria lehiaketako proposamen irabazlearentzat. Kopuru hori bateragarria da 350,00 euroko zuzkidurarekin, bai kategorია orokorrean finalista izateagatik lortutakoarekin, bai Gazte modalitateko proposamen irabazlea izateagatik lortutakoarekin. Horrenbestez, irabazleak 1.750,00 euroko ordainketa bakarra jasoko du, eta dagokion atxikipena izango du.

4. artikulua. Parte hartzaileen betekizunak.

1. Kategoría orokorrean, edozein pertsona fisikok hartu ahal izango du parte, nazionalitatea edo bizilekua edozein dela ere.





2. Gazte kategorian, 25 urte beteta ez dituzten pertsonen hartu ahal izango dute parte, baldin eta arteekin edota diseinuarekin lotutako ikasketa ofizialak egiten ari badira edo egin badituzte. Bi baldintza horiek deialdi hau ALHAOn argitaratzen den egunean izan behar dituzte beteta.

3. Saridunek egunean izan behar dituzte zerga betebeharrak eta Gizarte Segurantzarekikoak.

4. Kultura Ekintza Zerbitzuak ofizioz egiaztatuko du pertsonen atal honetan adierazitako baldintzak betetzen dituztela. Egiaztatze horien aurka egiten badute, beraiek aurkeztu behar dituzte egitate horiek egiaztatzen dituzten agiriak, 39/2015 Legearen 28.2 artikulua arautzen duen bezala (Datu Pertsonalak Babesteko eta Eskubide Digitalak Bermatzeko abenduaren 5eko 3/2018 Lege Organikoaren azken xedapenetako hamabigarrenaren bidez aldatua).

5. artikulua. Hautagaien ezaugarriak.

1. Dosierraren ezaugarriak, kategoria orokorrerako: deialdiaren III. eranskinaren arabera, 3 eta 5 ilustrazio edo diseinu artean izan beharko ditu, eta horietatik 2 gutxienez kartelak izan beharko dira. Kartelak lehendik egindako lanak edo simulazioak izan daitezke. Dokumentu honen gehieneko tamaina 10 MB-koa izango da. Helburua da baloratzea hautagaiaren artelanaren kalitatea eta ilustrazio edo diseinu lanaren estiloa eta gaitasunak.

2. Kartelaren ezaugarriak, Gazte kategoriarako eta kategoria orokorreko hautagai finalistentzat: kartelaren proposamena aurkeztuko da PDF formatuan (72 dpi/RGB). Neurriak: 480 x 680 mm (bertikala). Artxiboa parte-hartzailearen ezizena erabiliz izendatu beharko da.

Kartelean testu hauek agertu behar dira (euskarazko testua lehentasunezko lekuan agertu behar da):

ARABAKO JAIK San Prudentzio eta Estibalizko Andre Maria Apirilak 28 – maiatzak 1 / 2026

FIESTAS DE ÁLAVA San Prudencio y Nuestra Señora de Estíbaliz 28 de abril – 1 de mayo / 2026

Arabako Foru Aldundiaren komunikazio marka azken diseinuan sartu beharko da, eta helbide honetan dago: <https://web.araba.eus/eu/foru-aldundia/erakundea/marka>

Kartelaren proposamena argitaragabea izan beharko da, aurretik beste ezein lehiaketatan saritu gabea eta hautagaiak egina. Berariaz debekatuta dago adimen artifiziala (IA) erabiltzea.

3. Bi kategorietan, lanak sinadurarik gabe agertu beharko dira. Erabilitako edozein sinadura edo marka digitalen bidez hautagaia identifika badaiteke, hautagaia zuzenean lehiaketatik kanpo utziko da.

6. artikulua. Hautagaitzak aurkeztea.

1. Deialdian parte hartu nahi duten pertsonen bide hauetakoren bat erabili beharko dute hautagaitza aurkezteko:

- a) Bitarteko elektronikoak: Arabako Foru Aldundiaren Egoitza Elektronikoan horretarako eskuragarri dagoen eskabide inprimakia bete behar da. Horretarako, aurretik, eskatzaileek Arabako Foru Aldundiak onartutako ziurtagiri elektronikoren bat eduki beharko dute. Informazio gehiago: <https://egoitza.araba.eus/eu/-/convocatoria-cartel-san-prudencio>
- b) Aurrez aurre: Arabako Foru Aldundiaren Erregistro Orokorrean (Probintzia plaza 5, behea), edo Administrazio Publikoen Administrazio Prozedura Erkidearen urriaren 1eko 39/2015 Legearen 16. artikuluan aurreikusitako gainerako moduetako edozeinetan.



Atal honetan jasotako moduan aurkeztutako eskabideak deialdi honetako II. eranskineko eredura egokitu beharko dira.

2. Proposamenak honela aurkeztu behar dira:

a) Gazte kategorian:

Eskabide formularioa bete beharko da, eta 5. artikuluan ezarritako ezaugarrien arabera kartela aurkeztu beharko da. Parte-hartzaile bakoitzak kartel bat baino gehiago aurkeztu ahal izango ditu kategoria honen barruan.

Gainera, arteekin eta/edo diseinuarekin lotutako ikasketa ofizialak egiten ari direla egiaztatzeko agiriak aurkeztu behar dira, edo ikasketa horiek amaitu direla egiaztatzen duen titulua.

b) Kategoria orokorrean:

Eskabide formularioa eta III. eranskinak bete beharko dira (dosieria, 5. artikuluan ezarritako ezaugarrien arabera).

3. Bi kategorietan, aurrez aurre aurkeztea erabakitzen bada, euskarri informatikoan (CDa edo pendrivea) erantsi behar dira lanak.
4. Artikulu honetako aurreko apartatueta adierazitakoarekin bat ez datozen bidalketak lehiaketatik kanpo geratuko dira.
5. Epaimahaiari lanak izenik gabe emango zaizkio, besterik ez. Egileen datu pertsonalak Arabako Foru Aldundiko Kultura eta Kirol Sailean gordeko dira, eta epaimahaiak ez du haietara sarbiderik izango.
6. Saria emateko ebazpenetik aurrera hogeita hamar eguneko epean eta hiru hilabete igaro arte, parte hartzaileek Kultura Ekintza Zerbitzuan jaso ahal izango dituzte aurrez aurre aurkeztutako euskarri informatikoak. Epe hori igarotakoan, euskarriak suntsitu egingo dira.

7. artikulua. Hautagaitzak aurkezteko epea.

Hautagaitzak aurkezteko epea deialdi hau ALHAOn argitaratu eta hurrengo egunean hasiko da eta 2026ko urtarrilaren 26an amaituko da, 23:59an.

8. artikulua. Beste sari batzuekiko bateraezintasuna.

Ezin dira lehiaketa honetara aurkeztu lehendik beste lehiaketa edo sariketa batean saria jaso duten kartelak.

9. artikulua. Hautagaitzak balioesteko irizpideak.

1. Sariak ematean, publikotasunaren, gardentasunaren, objektibotasunaren, berdintasunaren eta diskriminaziorik ezaren printzipioak bermatuko dira, aurkeztutako eskabideak alderatuz.
2. Saria emateko, obra guztiak irizpide hauen arabera balioetsiko dira:



Proposamenen sormena eta originaltasuna, diseinuari eta estetikari dagokienez.	12 puntu
Sinpletasun grafikoaren eta kalitate tekniko eta artistikoaren arteko konposizio oreka.	10 puntu
Ideen sintesiaren bidez komunikatzeko gaitasuna.	10 puntu
Testua argi eta irakurtzeko moduan txertatzea, kartelaren tamainaren arabera neurriekin.	8 puntu
Deialdia egin duen erakundea nola txertatu den eta erraz identifikatzen den (logotipoa).	5 puntu
Gizarte aniztasuna eta, bereziki, emakumeena modu abstraktuan edo literalean irudikatzea.	5 puntu

10. artikulua. Epaimahaia.

1. Gaitasun profesionalaren eta esperientziaren irizpideen arabera hautatu den epaimahai kalifikatzaileak deialdira aurkeztutako lanak, izengabeak, aztertuko ditu, eta deialdi honen 9. artikuluan ezarritako irizpideen arabera balioetsiko ditu.

2. Emakumeen eta Gizonen berdintasunerako eta Emakumeen aurkako Indarkeria Matxistarik gabeko Bizitzetarako Legearen testu bategina onartzen duen martxoaren 16ko 1/2023 Legegintzako Dekretuaren 21.3 artikulua betez (indarrean dagoen idazketan), sariak emateko sortutako epaimahaiak emakumeen eta gizonen osaera orekatua izan beharko du, eta eduki beharreko trebakuntza, gaitasuna eta prestakuntza izan beharko dute kideek. Lege horren arabera, lau kide baino gehiago dituzten epaimahaietan edo antzeko organoetan ordezkaritza orekatutzat joko da sexu bakoitzak gutxienez ehuneko 40ko ordezkaritza duenean, eta gainerako kasuetan, berriz, bi sexuak ordezkaturik daudenean.

3. Epaimahaia osatzen duten pertsonen erantzukizunpeko adierazpen bat aurkeztu beharko dute eta honako hauek adierazi: ez daudela Sektore Publikoaren Araubide Juridikoaren urriaren 1eko 40/2015 Legean aurreikusitako abstentzio arrazoien eraginpean, konfidentzialtasuna bermatuko dutela, emandako dokumentazioa ez dutela erabiliko deialdian ezarritako irizpideen arabera eskabideak balioestea ez den bestelako helburu baterako, eta txostena egin ondoren deialdiko dokumentazio guztia prozeduraren instrukzio organoari itzuliko diotela. Izendapen horiek Kultura eta Kirol Saileko diputatuaren ebazpen baten bidez onetsiko dira, eta ebazpen hori ALHAOn argitaratuko da, interesdunek errekusatzeko duten eskubidea baliatu ahal izan dezaten, lege ezarritako egoera eta baldintzetan.

4. Epaimahaiaren epaia apelaezina da, epaimahaiakideen gehiengo soilaz emango da, eta epaimahaiak izango du eztabaidetan sortzen diren gorabehera guztiak ebazteko ahalmena.

5. Epaimahaiak erabakiz gero, saria eman gabe utzi ahal izango da.

11. artikulua. Prozeduraren izapideak eta ebazpena.

1. Arabako Foru Aldundiko Kultura eta Kirol Saileko Kultura Ekintza Zerbitzua izango da prozedura izapidetzeko organo eskuduna.

2. Arabako Foru Aldundiko Kultura eta Kirol Sailak du deialdian sortzen edo planteatzen diren gai guztiak ebazteko eskumen eskusiboa.



3. Gazte kategorian, epaimahaiak aurkeztu diren proposamenen artetik kartel irabazlea proposatuko du 9. artikuluan adierazitako balioespen irizpideak aplikatu ondoren eta 12. artikuluan adierazitako epean.

4. Katetoria orokorrean, 5 hautagaitza finalisten hautaketa honako fase hauen arabera egingo da:

- a) Epaimahaiak bost finalista hautatuko ditu aurkeztutako hautagaitzen artetik, eta beste hiru erreserbarako, lehentasun hurrenkeran adierazita. Bost hautagai finalistek kartel proposamen bat egin beharko dute 12. artikuluan adierazitako epean.
- b) 350,00 euroko zuzkidura emango zaie finalista izan direnei, deialdi honetan ezarritako epean kartelaren proposamena aurkezten badute. Kartelaren proposamena epe barruan aurkezten ez bada, deialdi honetatik deskalifikatu egingo da berehala, eta aipatutako zuzkidura ekonomikoa kobratzeko eskubidea galduko da. Kasu horretan, hurrengo hautagaia izango da finalista, ezarritako lehentasun ordenari jarraituta.

5. Epaimahaiaren erabakia.

Epaimahaiak 9. artikuluan zehaztutako irizpideen arabera balioetsiko ditu katetoria orokorreko finalista izan direnen kartel proposamenak eta Gazte katetoriako irabazlearen kartel proposamena, eta proposamen irabazle bakarra izendatuko du.

Epaimahaiak txosten bat egingo du bere erabakia jasotzeko, eta organo izapidegileari igorriko dio. Organo horrek behin-behineko ebazpen proposamena egingo du, behar bezala arrazoituta, epaimahaiaren balioespenaren arabera, eta ebazteko eskumena duen organoari helaraziko dio.

6. Kultura eta Kirol Saileko titularrak dagokion ebazpena emango du deialdia ALHAOn argitaratu eta gehienez ere sei hilabeteko epean.

7. Saria emateko ebazpena banan-banan jakinaraziko zaie hautagai guztiei, Administrazio Publikoen Administrazio Prozedura Erkidearen urriaren 1eko 39/2015 Legean xedatutakoari jarraikiz.

12. artikulua. Deialdiko faseen epeak.

- Kultura eta Kirol Sailaren epea, katetoria orokorrean hautatutako bost hautagaitzei finalista geratu direla jakinarazteko eta Gazte katetorian aukeratutako hautagaiari irabazlea dela jakinarazteko: 2026ko otsailaren 6a.
- Katetoria orokorreko bost finalistek kartelaren proposamena bidaltzeko azken eguna: 2026ko martxoaren 1a, 23:59an.
- Kultura eta Kirol Sailaren epea, lehiaketaren irabazle izateko proposatu den pertsonari horren berri emateko: 2026ko martxoaren 6a.
- Kartel irabazlearen azken artelana bidaltzeko azken eguna: 2026ko martxoaren 13a, 23:59an.

13. artikulua. Saria ematetik eratorritako betebeharrak eta konpromisoak.

Deialdi honen irabazleak ezarritako moduan eta epean aurkeztu beharko du kartelaren azken artelana, eta, aurkeztu ezean, irabazle izaera eta dagokion diru zuzkidura galduko ditu, eta finalista izatera igaroko da. Egoera horretan, irabazle izaera hurrengo pertsonari esleituko zaio, ezarritako ordenari jarraituta, eta horrek, era berean, deskribatutako betebeharrak bete beharko ditu.



Kartel irabazlearen azken artelana inprentan erreproduzitzeko aurkeztu beharko da (bektoriala edo 300 dpi/CMYK), 12. artikuluan ezarritako epeetan.

14. artikulua. Ustiapen eskubideak

Irabazleak kartela erabiltzeko eskubideak lagako dizkio Arabako Foru Aldundiari, bai eta kartelaren zatiak edo motiboak erabiltzekoak ere. Arabako Foru Aldundiak saritutako lana ustiatzeko edozein modu erabili ahal izango du, hala nola kopiazea, banatzea, zabaltzea edo aldatzea, bai eta sare digitalen bidez igortzea, transmititzea eta eskura jartzea ere, Jabetza Intelektualari buruzko Legearen Testu Bateginaren 26. artikuluan adierazitako epean. Era berean, Arabako Foru Aldundiak erreproduzitutako kartela edozein euskarritan ustiatu ahal izango du merkaturatzeko, zuzenean edo hirugarren bati ustiatzeko baimena emanez.

15. artikulua. Publizitatea

Deialdi hau ALHAOn argitaratuko da. Halaber, Arabako Foru Aldundiaren web orrian, www.araba.eus, jarriko da eta www.kulturaraba.eus orrian.

16. artikulua.- Azken klausula

Deialdi hau honela arautuko da:

- 38/2003 Lege Orokorra, azaroaren 17koa, dirulaguntzei buruzkoa.
- 887/2006 Errege Dekretua, uztailaren 21ekoa, Dirulaguntzei buruzko azaroaren 17ko 38/2003 Lege Orokorraren Erregelamendua onartzen duena.
- 11/2016 Foru Araua, urriaren 19koa, Arabako Lurralde Historikoko dirulaguntzei buruzkoa.
- 3/2023 Foru Araua, urtarrilaren 25ekoa, Aurrekontuei buruzkoa.
- Ekitaldi honetarako indarrean dagoen aurrekontua betearazteko foru araua.
- 39/2015 Legea, urriaren 1ekoa, Administrazio Publikoen Administrazio Prozedura Erkidearena, eta aplikatzekoa den gainerako araudia.
- Emakumeen eta gizonen berdintasun eraginkorrerako 3/2007 Lege Organikoa.
- 3/2025 Foru Dekretua, otsailaren 4koa, Arabako Foru Aldundian hizkuntza ofizialen erabilerari buruzko irizpideei buruzkoa.
- 1/2023 Legegintzako Dekretua, martxoaren 16koa, emakumeen eta gizonen berdintasunerako eta emakumeen aurkako indarkeria matxistarik gabeko bizitzetarako Legearen testu bategina onartzen duena.
- Aplikatzekoa den beste edozein.